

# Setiap amal kebajikan dinilai oleh Allah

KERJA sukarelawan merupakan salah satu bentuk khidmat kebajikan yang sangat digalakkan dalam Islam.

Individu yang membuat amal kebajikan seperti membersihkan masjid telah dijanjikan ganjaran pahala yang cukup besar oleh Allah SWT.

Firman Allah SWT dalam surah al-Hajj ayat 77 bermaksud; *"Kerjakanlah amal-amal kebajikan, supaya kamu berjaya di dunia dan akhirat."*

Malah, Rasulullah SAW pernah bersabda dalam hadis riwayat Ibnu Majah; "Barang siapa mengeluarkan kotoran dari masjid, maka Allah akan membangunkan untuknya sebuah rumah di syurga."

**Pensyarah Kanan Fakulti**

**Pengajian al-Quran dan as-Sunnah, Universiti Sains Islam Malaysia, Nilai, Negeri Sembilan, Norakyairee Mohd. Raus** berkata, setiap amal kebajikan seseorang itu hanya boleh dinilai oleh Allah SWT.

Katanya, walaupun amal tersebut terlalu kecil pada pandangan manusia seperti membersihkan masjid, namun ia satu perbuatan yang mulia dan layak mendapat ganjaran.

"Setiap amal perbuatan walau sekecil mana sekalipun akan dinilai oleh Allah SWT pada hari akhirat kelak.

"Yang penting, setiap amal kebajikan haruslah dilakukan

dengan ikhlas dan tidak mempunyai sebarang niat tersembunyi," katanya ketika dihubungi *Kosmo!* baru-baru ini.



**NORAKYAIREE**

Ujar Norakyairee, sekiranya pelaku kerja amal mendapat habuan dalam bentuk wang atau makanan daripada masyarakat maka ia dianggap sebagai ganjaran dunia semata-mata.

Sementara itu, beliau turut memuji usaha yang dilakukan oleh kumpulan pejalan kaki A Day Without

Tomorrow (ADWT) dianggotai oleh Annas Aiman Jaffry, 27, adiknya, Muhammad Aidil, 24, dan rakan karib mereka, Hizamuddin Alidin, 25.

Kumpulan tersebut telah berjaya

membersihkan sebanyak 140 buah masjid di seluruh Semenanjung Malaysia dengan hanya berjalan kaki.

Jelasnya, tidak ramai golongan muda yang berminat dengan kerja-kerja amal di sekitar masjid.

"Saya lihat, jurang antara golongan tua dan muda menjadi punca mengapa tidak ramai belia terlibat dalam kerja amal di masjid. Kerja-kerja di masjid lebih sinonim dikaitkan dengan tugas iman dan bilal.

"Justeru, diharap usaha yang dilakukan oleh ADWT dapat menarik golongan muda ke masjid melakukan ibadat sekali gus menarik minat mereka membuat amal kebajikan," katanya.